

**Raja Muda Perlis Minta Ahli Akademik Perbanyakkan Penyelidikan
Bernama
13 Disember, 2011**

GEORGE TOWN, 13 Dis (Bernama) -- Raja Muda Perlis Tuanku Syed Faizuddin Putra Jamalullail mahu ahli akademik memperbanyakkan penyelidikan yang berupaya menawarkan penyelesaian konkrit dan bukan bersifat retorik semata-mata.

Baginda berharap ahli akademik akan mengambil sikap berhati-hati dalam menentukan titik perbezaan antara sumber penyelidikan yang berunsur cakap kosong, retorik dan realiti.

"Kejayaan negara banyak bergantung kepada kebijaksanaan golongan ahli akademik mengenal pasti permasalahan berkaitan.

"Justeru ahli bijak pandai mesti ingat bahawa peranan penting yang dimainkan sesebuah universiti itu adalah mengenal pasti jalan penyelesaian sejajar dengan matlamat untuk mewujudkan pembangunan mapan," titah baginda ketika merasmikan Forum Pendidikan Tinggi Global Ketiga (GHEF) di sini Selasa.

Turut hadir Raja Puan Muda Perlis Tuanku Lailatul Shahreen Akashah Khalil, Ketua Pengarah Jabatan Pengajian Tinggi Datuk Rujhan Mustafa dan Naib Canselor Universiti Sains Malaysia (USM), Prof Datuk Omar Osman.

Seramai 358 ahli akademik dari 25 negara menghadiri forum tiga hari itu. Mereka akan berkongsi pengetahuan dalam isu berkaitan pengukuhan peranan universiti di negara masing-masing.

Tuanku Syed Faizuddin bertitah peranan institusi pengajian tinggi bukan sekadar memperluaskan jaringan kerjasama menerusi perjanjian persefahaman tetapi juga mengesyorkan penyelidikan berstruktur dan bersistematik bagi membantu negara berdepan pelbagai cabaran.

"Kita perlu bertanggungjawab kepada rakyat negara ini yang mahu melihat IPT berkembang menuju ke tahap terbaiknya dan merealisasikan fasa demi fasa Pelan Strategik Pendidikan Tinggi Negara," titah baginda.

Pelan itu adalah satu wadah yang menjadikan negara sebagai hab bagi pendidikan tinggi di rantau Asia Pasifik selain membantu usaha kerajaan menghasilkan modal insan berkualiti.

Menurut Tuanku Syed Faizuddin, pelan itu akan dapat memperkayakan inovasi dan kreativiti, memaksimumkan ekosistem pengajian tinggi negara dan menjana transformasi kepemimpinan di universiti tempatan.

--BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=633855>

